

# Stgaurar cun segirezza durant l'enviern cun energia stgarsa

Cun in'eventuala stgarsezza d'energia vegnan blers a metter fiu en pigna e cheminés, era sch'els n'èn betg disads da far quai. Stgaurar cun laina ed il diever da pignas electricas chaschuna in grond privel da fiu e schizunt d'intoxicaziun e sto esser emprendì. Era pervia da chandailas hai gia dà insaquants incendis.

La crisa d'energia muventa la Svizra. Preoccupaziuns pervia d'ina eventuala stgarsezza da gas e d'electricidad durant quest enviern chaschunan malsegirezzas tar la populaziun. La dumonda fermamain augmentada per laina dad arder e pignas electricas mussa che locataris e proprietaris d'abitaziuns planiseschan da reactivar las metodos da stgaurament da temps passads en cas d'ina mancanza d'electricidad e da gas. Els han l'intenziun da reactivar la pigna utilisada sporadicamain u il cheminé duvrà be darar e da prender ord stgaffa las pignas electricas ed els cumpran bleras chandailas.

## Mantegniment ed applicaziun gista da metodos da stgaurar alternativs

Pignas e cheminés pon esser privlus, sch'els vegnan duvrads incorrectamain u sch'els vegnan negligids, perquai ch'els pon chaschunar incendis u perquai che sortan svapurs toxicas privlusas per ils umans. Pignas, cheminés e chamins che n'èn gia daditg betg pli stads en funcziun ston vegnir controllads d'in spazzachamin u tschentapignas avant l'emprim diever. Da duvrar pignas electricas vegn scusseglia cumplettamain, perquai che quellas consumeschan extrem blera electricidad e per motivs da solidaritad. Almain stuess vegnir examinà ordavant, sche tut las spinas e clavellas e tut ils cabels sajan en urden. Chandailas n'èn betg in stgaurament effectiv e lur privels vegnan savens sutvalitads. Mettai las chandailas sin in fundament solid e betg inflammabel e duvrai portachandailas betg inflammabels. Chandailas envidadas ston esser survegliadas permanentamain.

## Far fiu endretg

Sch'ins fa fiu cun laina, èn d'observar insaquants reglas. L'approvisiun cun aria frestga sto adina esser garantida. En cas d'edifizis vegls e permeabels n'è quai per regla nagin problem. Sch'i sa tracta d'edifizis pli vegls ch'èn vegnids sanads ed han ina mantellada dal bajetg pli cumpacta u schizunt dad edifizis da minergia, n'è l'alimentaziun cun aria frestga betg adina garantida. Via il tschitschavapur poi dar ina sutpressiun en l'abitaziun ed en consequenza po entrar fim che po donnegiar persunas e l'interiur. Allontanai tarpuns e mobiglias da la vischinanza dal fiu. Faschai fiu endretg. Sche Vus vulais evitar fim, stuais Vus far fiu da sisum fin giudim. In'instrucziun chattais Vus sin [www.fairfeuern.ch](http://www.fairfeuern.ch). Utilisai sulettamain laina dad arder setga d'almain dus onns, nagina laina da rument. Sch'ins chargia memia ferm las pignas e metta adina puspè suenter laina, pon las pignas surstgaurar e chaschunar incendis. Na duvrai mai acceleraders da fiu (spiert, benzina). Ina pigna na dastga betg adina funcziunar al limit. Infurmai Voss spazzachamin che l'indriz vegnia duvrà puspè e ch'el stoppia nettegiar el.

## Allontanar correctamain la tschendra

Tractai correctamain la tschendra da laina! Tschendra na tutga mai directamain en il satg da rument. Tschendra po brasclar fin a 48 uras e duai sfradentar en ina sadella da metal cun viertgel. La sadella sto vegnir messa sin in fundament betg inflammabel. Sadellas da tschendra retschavais Vus da Voss spazzachamin u directamain tar l'Assicuranza d'edifizis dal Grischn, Ottostrasse 22.



Il center d'infurmaziun per la prevenziun d'incendis Cipi ha cumpilà cussegls simpels, ma effectivs: [www.bfb-cipi.ch/gas-und-strommangel](http://www.bfb-cipi.ch/gas-und-strommangel)